

Nama Reti Kristen?

BAGI KE EMPAT

Kitai ENDA TAU ENDA rindu ka menyadi enggau pangan diri !

1. “Nuan enda tau enda rindu ka pangan diri, baka asai nuan rindu ka diri empu” (Matthew 22:39).
 - ☞ Selalu bepikir ka utai ti manah (positif). Anang bepanggai ba runding ti tau mai kitai beserekang enggau pangan diri (orang bukai mega). Nguji ngaga pengerindu (ukai pengerindu bujang dara) ti ulih mai kitai besaum enggau pangan diri, baka asai kitai ti rindu ka diri empu. Nya meh pengawa ti dikerindu ka TUHAN. Tu meh pesan ti kedua besai dipadah ka Tuhan Jesus ngagai kitai, ti enda tau enda dipegai enggau teguh.

2. Rindu ka orang ti begedi ka kitai sereta bisi penyinu ngagai orang bukai, ¹⁴Kitai nemu diri udah ngelimpas (ninggal ka) pematī ngagai pengidup, laban kitai rindu ka menyadi diri. Barang sapa ti enda rindu (ka menyadi iya tauka orang bukai), agi mengkang dalam pematī. ¹⁵Barang sapa begedi ka menyadi diri endang pemunoh, lalu kita nemu pemunoh endang nadai pengidup meruan dalam iya. ¹⁶Tu kebuah kitai nemu reti pengerindu, laban Iya (Kristus) udah meri nyawa Iya empu kategal kitai. Kitai mega patut meri nyawa diri kategal menyadi kitai. ¹⁷Enti orang ti kaya (mayuh pemisi) meda menyadi iya ti seranta, tang enda kasih ka iya, bakani pengerindu Allah Taala bisi (mengkang) dalam iya? ¹⁸Anak aku (ko John), awak ka pengerindu kitai enda semina dalam jaku tauka mulut aja, tang pandang ka nya ngena kereja enggau pemendar.” (1 John 3:14-18).
 - i. Genteran 14; Lebu kitai arap lalu nerima Jesus nyadi ka Tuhan enggau Pengelepas kitai, reti nya, pematī (pematī roh) nadai agi bakuasa atas kitai. Laban dalam Jesus, pengerindu Iya nya ti mai kitai bisi pengidup ti baru. Lalu orang ti nadai pengerindu ka orang bukai tauka menyadi diri, endang agi mengkang dikuasa pematī.
 - ii. Genteran 15; Rasul John ngamat ka ajar Jesus pasal, barang sapa ti begedi ka orang bukai, endang udah nyadi pemunoh dalam ati iya (Matthew 5:21-22). Kristian tu ianya pengarap (agama) ti datai ari ati. Angkun (pemanah /alim) di luar aja enda chukup. Ngembuan ati ti begedi ngagai orang bukai, ti udah besalah ka (charut enggau) kitai, sabaka enggau rumbak (kinsa) ti dalam tubuh ti tau ngerusak kitai. Anang ngasuh ‘urat kayu ti pait’ (Hebrew 12:15), betumbuh dalam diri kitai sereta enggau dalam gerija.
 - iii. Genteran 16; Pengerindu ti bendar iya nya, terus ngereja iya, ukai penyinu ba ati aja. Pengerindu tu ukai dikena ngemansang ka diri empu, tang meri hari (meri nyawa diri) diri ngagai orang bukai. Pengerindu ti pemadu besai, ianya meri diri empu nyaup orang bukai. Bakani kitai tau meri nyawa diri ka orang bukai? Mantu orang enggau nadai ngira balas tauka upah iya. Jesus empu ngajar kitai utai ti sama ba John 15:13.
 - iv. Genteran 17-18; Baris tu nerang ka teladan ti tau ditunda kitai, bakani kitai tau meri nyawa diri kategal orang bukai, ianya nyaup sida ti amat minta tulong. Ajar tu mega sabaka enggau pesan ti ditulis Rasul James dalam (james 2:14-

Nama Reti Kristen?

17). Ni naka pengawa kitai, ti ulih nunjok ka kitai amat rindu ka orang? Lempung ati (enda belampung ati mantu orang nadai ngira maya) tauka gerah jari (meri duit enggau reta)?

3. Rindu ka pangan diri enggau ati ti tulin (bisi pemendar) **(1 Peter 1:22)**.
 - ☞ Pengerindu ti tulin, ianya sanggup mantu enggau nadai belampung ati. Orang ti ngira diri empu nadai pengerindu ti tulin tauka pengerindu iya nadai bisi pemendar. Pengerindu enggau pengampun ti diberi Allah Taala udah ngelepas ka kitai ari ti semina ngira diri empu, awak ka kitai ulih meri penyaup ngagai sida ti amat berguna ka pengasih kitai. Jesus udah mandang ka pengerindu Iya ti bendar ngagai kitai. Awak ka teladan ti udah ditunjuk ka Iya tau meri kitai chunto ti patut dititih ka kitai lebu ti agi idup ba dunya tu.
4. Pengerindu ngagai pangan diri, nya dikena kitai amat ngamat ka pesan Allah Taala **(Adat Lewi 19:18)**. Kitai mega ukai semina rindu ka pangan diri, tang besampi ka sida ti bejai (nyumpah) kitai. ²⁷*Tang Aku (Jesus) madah ngagai kita ti ninga ka Aku; Rindu ka ka munsuh kita, kereja utai ti manah ngagai sida ti begedi ka kita.* ²⁸*Berekat ka sida ti nyumpah kita, lalu besampi ka sida ti jai enggau kita,* **(Luke 6:27-28)**.
 - ☞ Jesus ditu ukai ngenang pasal kitai patut bisi pengasih ngagai munsuh kitai. Tang ngenang pasal peneka ati enggau pemadas kitai dalam TUHAN. Kitai enggai nyadi teparuk (labuh) ngagai pengerindu ti baka nya. Laban nya berguna ka pemereti ati ti amat tulin. Laban mega, enti kitai rindu ka munsuh, nya ti ngujong ka sida tau peneka ati ngereja kitai. Nadai salah kitai besampi ka sida, lalu ngiga jalai ti tau meri penyaup ngagai sida, ngambi ka sida enda bemunsuh enggau kitai agi. Jesus udah mandang ka kitai chara Iya rindu ka mensia, baka nya pan mayuh mensia ti enda arap sereta ngelaban Iya, tang Iya mengkang rindu ka sida iya. Bebas ka munsuh (orang ti begedi ka kitai) kitai, sabaka reti kitai ti deka minta (bisi pengingin) basa ti sama ari orang bukai mega.
5. Orang Kristian enda tau begedi ka menyadi diri. ⁹*Barang sapa ti madah ka diri penampak, tang begedi ka menyadi iya (menyadi diri enggau orang bukai) agi diau dalam pemetang.* ¹⁰*Barang sapa ti rindu ka menyadi iya, diau dalam penampak lalu nadai utai dalam iya ti tau ngasuh labuh (bedosa).* ¹¹*Tang barang sapa ti begedi ka menyadi iya, diau dalam pemetang (agi bedosa), enggau nya iya agi bejalai dalam petang lalu enda nemu tuju pejalai diri; laban pemetang nya udah ngasuh iya buta (enda ngelala utai ti bendar).* **(1 John 2:9-11)**.
 - i. Kati genteran jaku tu madah ka, enti kitai enda rindu ka orang bukai, kitai ukai orang kristian? Genteran jaku tu ukai nusoi pasal kitai ti enda rindu kategal ti nadai sama runding tauka penemu enggau menyadi kitai dalam Kristus. Laban endang bisi orang ti enda dikerindu ka kitai, lalu baka nya mega sida ti ka bukai enda rindu ka pangan diri. Jaku Rasul John ditu nerang ka reti perangai enggau ulah, ti tau ngasuh kitai nadai pengibuh tauka ngemaruh ka orang nya tauka ngutok orang bukai tauka ngasuh ati iya begedi, tauka bepekit enggau pangan diri tauka bemunsoh enggau iya.
 - ii. Pengerindu orang kristian ukai bepanggai ba pengasai ati (e.g. enti aku deka rindu, nya barang ko aku, ti aku enggai enda!), tang bepanggai ba chara kitai

Nama Reti Kristen?

milih (milih ulih ati ti amat bisi pengerindu ti tulin). Kitai tau milih kategal ti amat bisi pengasih ka orang bukai, lalu bebasa ka sida, sekali ka kitai bisi angkun dalam ati sereta amat sinu ngagai orang nya. Enti kitai milih rindu ka orang nya, Allah Taala deka nyaup mandang ka pengerindu kitai.

6. **(Kolosi 3:13)**; *“Besaup enggau diri sama diri, ampun pangan diri, lebu barang kita bisi salah ngelaban pangan diri. Kita enda tau enda ngampun pangan diri baka Tuhan ti udah ngampun kita”*.

☞ Kunchi pengineat, ianya kitai patut ngampun pangan diri, baka Kristus ti udah ngampun penyalah kitai. Tuhan Jesus udah ngampun penyalah kitai ti pemadu besai ti enda ulih dikereja kitai kadiri. Kati kitai bisi penanggul (pemedis) ngampun pangan diri kategal menyadi (orang bukai) ti udah ngemedis ka kitai mimit aja? Kitai patut sedar ka pengerindu Allah Taala enggau chara IYA ti udah ngampun kitai, awak ka nya tau nyadi ka peransang kitai ngampun penyalah orang bukai ti salah ngelaban kitai. Awak ka kitai ngengkah ka pengirau kitai ba jari TUHAN kategal kitai ti udah merinsa. Anang neju ka pengidup kitai aus ka pengelurus kategal penyarut enggau orang bukai, tang belabuh ngubah nya ngena pengerindu, pemaik enggau pengelantang.

Udah tu peda BAGI Ke Lima – Ngasi Ka Pesan TUHAN.....